

Sì. Gea. Ja zum Sprachengesetz

Pro Lescha da linguas dal chantun Grischun, 7001 Cuir

Communicaziun a las medias

Il Grischun s'identifitgescha cun la trilinguitad

Las Grischunas ed ils Grischuns èn s'exprimids a favur da la nova Lescha da linguas dal chantun Grischun. La lescha è vegnida acceptada cun in bun resultat da 53.9 pertschient vuschs affirmativas. Ils aderents da la lescha sa sentan confermads en lur tenuta e satisfatgs da lur campagna. Els èn fitg cuntents che las votantas ed ils votants grischuns s'associeschan clermain cun la diversidad linguistica en il Grischun.

Il comité "Pro Lescha da linguas dal chantun Grischun" è fitg cuntent cun il bun resultat da la votaziun. En in'emprima posiziun lauda il comité il senn da responsabladad per la trilinguitad che las Grischunas ed ils Grischuns han demussà. Las votantas ed ils votants grischuns han resistì als arguments dals adversaris ed approvà las mesiras da sustegn per las duas linguas minoritaras. Il Grischun è s'identifitgà cun sia trilinguitad ed ha reconuschì la plivalur da questa diversidad linguistica. Tras questa decisiun vegn er onurada la lavur da la Regenza e dal Cussegl grond.

L'identidad en il center

Il fatg che la nova lescha da linguas è vegnida approvada interpretescha il comité pro sco indizi che las mesiras da protecziun prevesidas per il rumantsch e per il talian vegnian consideradas sco necessarias. Las Grischunas ed ils Grischuns han decidì sco usità a moda pragmatica. La maioritad tudestga dal Grischun ha demussà la solidaritad politica necessaria cun las duas cuminanzas linguisticas pli flaivlas.



Prendì serius ils adversaris

Il comité pro engrazia a las Grischunas ed als Grischuns per lur sustegn da la diversità linguistica e culturala en il Grischun. Ils aderents engrazian er al ravugl enturn Peter Schnyder che ha lantschà ina vasta discussiun davart las linguas. Era sche tscherts arguments n'eran betg adina corrects e sch'il stil da la campagna era mintgatant almain discutabel, han ins adina prendì serius ils adversaris en il cumbat da votaziun ed en las discussiuns. Uss spera il comité pro che la nova Lescha da linguas dal chantun Grischun vegnia realisada tenor termin - per ch'il mantegniment da la lingua e cultura rumantscha e taliana possa vegnir sustegnì sin questa via.

Cuira, ils 17 da zercladur 2007

Contact per las medias:

Gion A. Derungs, Pro Lescha da linguas dal chantun Grischun, 7001 Cuira
Telefon +41 (0)79 262 32 80, www.triling.ch

